



Акафист

святому преподобному Савве, игумену Сторожевскому, Звенигородскому чудотворцу

Кондак 1

Избранный от Воеводы и Господа воинств небесных, преподобне отче наш Савво, силою креста Господня победивый напасти, яже от диавола, мира и плоти, яко имея дерзновение ко Господу, от всяких искушений, бед и наветов вражиих молитвами твоими сохраняй нас, похвальная с любовью тебе воспевающих:

Радуйся, отче наш Савво, чудотворче преславный.

Икос 1

Ангел во плоти явился еси на земли, преподобне Савво, от юности бо возлюбив Бога, равноангельному поревновал еси житию учителя твоего, преблаженнаго Сергия, и послужив Господеви в правде и преподобии во вся дни

живота своего, по исходе нетлением телесе сияеши. Все убо благоговейно чтуще тя, воспеваем сице:

Радуйся, истинный святого учителя твоего ревнителю.

Радуйся, земный Ангеле и небесный человекче.

Радуйся, верный слуго Господень.

Радуйся, усердный чистоты и воздержания хранителю.

Радуйся, зеркало веры благочестивыя.

Радуйся, образе кротости духовныя.

Радуйся, пустынножителей красото.

Радуйся, иноков наставниче.

Радуйся, многим ко спасению путеводителю.

Радуйся, скорый помощниче притекающим к тебе с верою.

Радуйся, отче наш Савво, чудотворче преславный.

Кондак 2

Видя, яко в мире сем всяческая суета и тление, потщался еси тесным и прискорбным путем течение жизни сея совершити; вселився

во обители преподобнаго Сергия, и от него прияв ангельский образ, поревновал еси богомудрому его смирению и трудолюбию, и купно с ним день и ночь воспевал еси Спасителю, всех Богу: Аллилуия.

Икос 2

Разум и сердце покорив Христу Спасителю, глаголющу: "Иже хочет по Мне ити, да отвержется себе, и возьмет крест свой, и по Мне грядет",- невозвратно отвратил еси лице свое от мира сего, яко от Вавилона греховнаго, и презрев вся красная и благая его, водворился еси в пустыни, чая Бога, спасающаго воителей Своих. Ныне же предстоиши Престолу Божию, наслаждаяся небесных благ, и велие дерзновение имея ко Господу, не забуди нас, к раце мощей твоих усердно притекающих и восхваляющих тя:

Радуйся, житейских сует и мирских соблазнов избежавый.

Радуйся, иноческое безстрастие и безмолвие стяжавый.

Радуйся, вся благая земли, Небеснаго ради Царствия, за уметы вменивый.

Радуйся, равноангельное житие до конца возлюбивый.

Радуйся, возненавидевый мира сего греховную сладость.

Радуйся, восприемый обетование непрестающия жизни.

Радуйся, облеченный славою Небеснаго Царствия.

Радуйся, сокровище некрадомое и нетленное обретый.

Радуйся, о Церкви Христовой, на земли воинствующей, молитвенниче небесный.

Радуйся, о всех верных, на поклонение к тебе притекающих, предстателю.

Радуйся, отче наш Савво, чудотворче преславный.

Кондак 3

Силою, излиянною на тя свыше, возшед на высоту добродетелей, постом и бдением, молитвами и целомудрием, яко многоценным венцем благоустроения иноческаго, повсюду просиял еси: сего ради вси велика и преславна тя почитаху. Ты же, бегая славы от человек,

пребывал еси яко един от простых, труждаяся паче всех и поя хвалу единому, в Троице славимому, Богу: Аллилуия.

Икос 3

Имеяй душу, смиренномудрия исполнену, аще и устрашался бремене начальства, обаче не преслушав воли Божия, приял еси порученное тебе стадо Христово и добре в пасении его пребыл еси. Ныне же, выну предстоя Престолу Божию, благоспешествуй молитвами твоими всем, взывающим к тебе:

Радуйся, непрекословный воли учителя твоего исполнителю.

Радуйся, добрый стада Христова наставниче.

Радуйся, возлюбленный паче многих избранником Божиим Сергием, от негоже не утаися святыня твоя.

Радуйся, благовонный крине вертограда церковнаго.

Радуйся, светлый сосуде Божественныя благодати.

Радуйся, светильниче, не сокрывыйся под спудом, но на свещнице поставленный.

Радуйся, честное Святаго Духа селение.

Радуйся, преподобных светлое украшение.

Радуйся, иноков в подвизех постнических укрепляяй.

Радуйся, заблуждшим путь спасения показуяй.

Радуйся, отче наш Савво, чудотворче преславный.

Кондак 4

Бурю страстей и искушений вражиих, препобеждая постом, бдением и молитвами, утолил еси до конца. Ныне убо причащаяся славы небесныя со всеми святыми, предстоиши Царю славы и поеши купно с ними: Аллилуия.

Икос 4

Слышаще ближнии и дальнии богоугодное твое житие, стекахуся от окрестных стран к тебе, пользы ради: ты же всех любезно приемля, согревал еси сердца их Божественною любовию. К тебе убо и мы припадающе, молим: настави ны, яко отец чада своя, на стези спасения и не забуди взывающих к тебе:

Радуйся, всем прибегающим к тебе
наставниче предобрый.

Радуйся, ищущим успокоения совести
собеседниче претихий.

Радуйся, унывающих душ утешителю
пресладкий.

Радуйся, кающихся со умилением ходатаю
преусердный.

Радуйся, заблуждающих исправителю
прекроткий.

Радуйся, беззаконных обличителю
незлюбивый.

Радуйся, к воздержанию и целомудрию
путеводителю неослабный.

Радуйся, борющимся со страстями
помощниче неутомимый.

Радуйся, праваго пути веры и благочестия
указателю неложный.

Радуйся, молящимся тебе от гнева Божия
защитниче неотступный.

Радуйся, отче наш Савво, чудотворче
преславный.

Кондак 5

Боготечная звезда явился еси, преподобне отче Савво, от мрака греховнаго хотящим прейти к Солнцу правды, ясно путь показующая. Темже молим тя: просвети и наша сердца, страстьми житейскими омраченная, и способствуй нам достойно воспевати Богу: Аллилуия.

Икос 5

Видя благоверный князь Георгий смиренномудрие твое, яко уклонился еси от начальственных власти во обители учителя твоего, устремляясь к пустынному безмолвию, той умоли тя, да вселишися на горах, глаголемых Сторожи. Ты же, изволя благое послушание явити благому желанию, и обитель иноческую zde составить хотя, рекл еси со пророком: "Се покой мой, zde вселюся, яко изволих и". И скоро на месте сем храм Пресвятыя Богородицы создася, в немже ныне нетлением мощей твоих благоухаеши, и немолчно ко Господу вопиеша о возглашающих к тебе сицевая:

Радуйся, горлице пустыннолюбная и добровидная.

Радуйся, пустыни доброе прозябение.

Радуйся, цвете присноцветущий.

Радуйся, смиренномудрием и всякими добродетельми страну сию облагоухавший.

Радуйся, благополезно и мудро прошение князя совершивый.

Радуйся, церковь прекрасну zde во славу Рождества Богородицы соорудивый.

Радуйся, пустыню во обитель иночества претворивый.

Радуйся, стаду твоему верный наставниче.

Радуйся, всем притекающим к тебе мир и благословение от Господа молитвами твоими низводящий.

Радуйся, о всех градах и весех российских молитвенниче неусыпающий.

Радуйся, отче наш Савво, чудотворче преславный.

Кондак 6

Проповеди Евангельския послушав: "Не пецытесе душею вашею, что ясте, или что пиете; ни телом вашим, во что облечетесь",- упразднил еси сердце твое от житейских забот, питаюся

былием пустынным и малоценныя ризы нося. Сего ради нетления одеждою одеялся еси по преставлении твоем, юже от Христа Бога получитьи и нам испроси, вопиющим Ему: Аллилуия.

Икос 6

Возсиял еси, яко богосветлое светило, во стране Российстей, всеблаженне отче Савво, озаряя нас лучами добродетелей и чудес твоих, темже вопием ти:

Радуйся, дарованиями Святаго Духа сияющий члене Церкви Христовы;

Радуйся, преизобилующий истинным к Богу умилением.

Радуйся, подражателю преподобных в совершенном терпении.

Радуйся, подвигов иноческих ревнителю.

Радуйся, страсти греховныя, силою благодати, в себе умертвивый.

Радуйся, нищеты и нестяжания образе.

Радуйся, светлое святыни зеркало.

Радуйся, всех добродетелей рачителю.

Радуйся, немощных целебниче.

Радуйся, жезле, падающих подкрепляющий.

Радуйся, отче наш Савво, чудотворче преславный.

Кондак 7

Хотящу благоверному князю Георгию воинствовати на супостаты, благословение преподал еси, отче, на одоление, глаголя пророчески: "Изыди, благоверный княже! Господь ти поможет, и врагов твоих одолееши, и благодатию Божию здрав возвратишия в отечество твое!",- еже и бысть, по глаголу твоему. Он убо, возвратився от брани с победою и славою, и многими дарми снабдевая обитель твою, воспеваше благодарственно дивному во святых Своих Богу: Аллилуия.

Икос 7

Новый раздражитель древних ратоборцев на страсти плотския явился еси, отче Савво: от юности бо ум твой вперив к Богу, яко столп веры непоколебимый, даже до старости маститыя пребыл еси в распинании плоти своея со страстьми и похотьми. Сего ради не можаху силы бесовския запинати ногама твоима, ниже успеваху устрашати тя издалеча, от ихже

наветов и напастей соблюди неврежденных и нас, торжественно воспевающих тебе:

Радуйся, лику древних постников сопричтенный.

Радуйся, всенощными молитвами и бдением всю прелесть бесовскую посрамивый.

Радуйся, чистоты и воздержания хранителю.

Радуйся, страстей душевных и телесных победителю.

Радуйся, воине Христов неустрашимый.

Радуйся, обдержимым бесовскою силою надежный врачу.

Радуйся, надменных мудрованием плоти к покорению глаголам Божиим приводяй.

Радуйся, всем нападваемым от духа лъсти духовное зрение и трезвение подаваяй.

Радуйся, духа вражды и любоначалия от притекающих к тебе прогоняяй.

Радуйся, яко ходатайством твоим даров Святаго Духа, в воинствовании Христовом укрепляющих, сподобляемся.

Радуйся, отче наш Савво, чудотворче преславный.

Кондак 8

Странное чудо сотворил еси, предивный отче Савво, егда нечестивии хотяху расхитити достояние церкви твоея. Они, яко татие, устремляхуся оконцем, еже бе у гроба твоего: zde же велия гора показася им, на нюже взыти несть мощно. Со студом убо возвращешся отсюда, последи же раскаявшеся, с воплем и слезами, грех свой исповедаша пред всеми, и скоро путь неправды оставльше, в покаянии прочее пожиша, с верою вопиюще Богу: Аллилуия.

Икос 8

Весь был еси в Бозе, еще сый на земли, в подвизах иноческаго жития: предстоящу бо ти пред лицом Господним на Божественной службе, зримо бываше воспламенение чудное в лице твоем от молитвеннаго в душе горения к Богу. Овогда же в толиком бе умилении душа твоя, яко источатися потокам слезным от очес твоих неудержимо, ихже ради единоправна тя зряху быти со пророком, глаголющим: "Быша слезы моя мне хлеб день и ночь". Обаче, велие стяжав дерзновение к Богу, не забуди и нас, со слезами

печали о гресех своих к твоему заступлению притекающих и вопиющих к тебе:

Радуйся, огнем Божественная любви ветхаго человека в себе попаливый.

Радуйся, во плоти, аки безплотен, на земли поживый.

Радуйся, живыми и спасительными слезами огонь похоти угасивый.

Радуйся, горняя радости и блаженства ангельскаго сопричастниче.

Радуйся, за премногую любовь твою к Богу Отцу славою и честью препрославленный.

Радуйся, за глубокое смирение твое от Христа, Сына Божия, венцем нетления увенчанный.

Радуйся, за чистоту и безстрастие ангельское от Пресвятаго Духа осиянный.

Радуйся, пречестная обители Святыя Троицы.

Радуйся, Божия Матере служителю верный и неусыпаяй.

Радуйся, в храме Ея горе возносивыйся духом, и ныне телом паки пребываяй.

Радуйся, отче наш Савво, чудотворче преславный.

Кондак 9

Всякия беды и скорби избави нас, преподобне отче Савво, твоими теплыми к Богу молитвами, и испроси нам вся, ко временной и вечной жизни потребная, да сподобимся горняго Иерусалима достигнути и купно с тобою воспевати Богу: Аллилуия.

Икос 9

Витии многовещаннии недоумеют достойно восхвалити тя, богомудре Савво: кто бо доволен разумети вся борения твоя с миродержители тьмы века сего? Или кто изочтет труды, болезни и подвиги твоя, в нихже пустыннолюбное житие совершал еси? Обаче мы, любовью твоею побеждаеми, благодарне тебе зовем:

Радуйся, закона Божия исполнителю всеусердный.

Радуйся, чистотою и целомудрием многоценнаго бисера честнейший.

Радуйся, в терпении и борении противу плоти адаманта твердейший.

Радуйся, смиренномудрием и кротостию паче славных земли прославленный.

Радуйся, борющимся со страстями и похотями помощниче непобедимый.

Радуйся, в трудах, бдении и воздержании великим постником подражателю ревностнейший.

Радуйся, в духовной мудрости наставниче благоискуснейший.

Радуйся, подвигов иноческих показателю рачительнейший.

Радуйся, другу Божию, преподобному Сергию, единокровный.

Радуйся, к лику друзей Божиих на Небеса преселившийся.

Радуйся, отче наш Савво, чудотворче преславный.

Кондак 10

Спаستися хотяще вернии от различных напастей и бед мира сего, тебе теплаго предстателя и молитвенника к Богу предлагаем: не тщетну сотвори нашу надежду на молитвы твоя, но ходатайством твоим избави нас от

лютых бед, напастей, искушений и скорбей, да несмущенно, от избытка сердца, глаголем всегда Богу: Аллилуия.

Икос 10

Стену ты тверду и молитвенника изрядна стяжав, святая обитель твоя и вси страны Российския заступлением твоим хвалятся. Темже и мы грешнии, ко гробу твоему притекше, яко чада отца, молим: заступи и сохрани нас от искушений и скорбей, бед и напастей, молитвами твоими, да взываем ти радостно:

Радуйся, благовонный крине райскаго вертограда.

Радуйся, кипарисе, верных сердца благовонием услаждающий.

Радуйся, древо благосеннолиственное, имже обитель твоя покрывается.

Радуйся, неусыпный молитвенниче, желания верных во благих исполняй.

Радуйся, надеждо и отишие в мори жития сего плавающих.

Радуйся, твердое ограждение и прибежище усердно Богу работающих.

Радуйся, неисчерпаемый источник исцелений.

Радуйся, струе, напаяющая и веселящая жаждущих правды.

Радуйся, яко в скорбех житейских и обстояниих сподобляемся твоего заступления.

Радуйся, всех усердно притекающих к тебе от искушений и бед скорое избавление.

Радуйся, отче наш Савво, чудотворче преславный.

Кондак 11

Пение всеумиленное приносим ти, преблаженне отче Савво, и со дерзновением молим: вознеси ко Господу о спасении душ наших твою святую молитву, да сподобимся вечно в радости блаженней воспевати Богу: Аллилуия.

Икос 11

Светоподательными лучами блистает житие твое, отче наш Савво: всякия бо добродетели Евангельския является в тебе исполнение, темже и глаголем:

Радуйся, сугубья ради нищеты богатство небесное обретый. Радуйся, плачем и умиления слезами утешение вечное приявый.

Радуйся, алкавый и жаждавый правды, ныне же насыщаяйся райским блаженством.

Радуйся, милостивым обещанное воздаяние улучивый.

Радуйся, чистотою сердца твоего лицезрения Божия достигнувый.

Радуйся, миротворениями многими в лице сынов Божиих быти сподобивыйся.

Радуйся, терпением правды ради в Царство Небесное водворивыйся.

Радуйся, образом кротости, тихости и незлобия поучение сущим в озлоблении подаваяй.

Радуйся, примером братолюбия, ко исканию не своих си, но яже ближняго, и наша сердца утверждааяй.

Радуйся, всех со страхом работающих Господеви радости.

Радуйся, отче наш Савво, чудотворче преславный.

Кондак 12

Благодать, данная ти от Бога, целити недуги душевныя и телесныя, созывает верных ко всечестным мощем твоим: при нихже, и малое моление приносящим, велия благодать от Бога подается, юже приемлюще, друг со другом радостно Богу возглашаем: Аллилуия.

Икос 12

Поюще велия твоя, досточудне отче, подвиги и труды, ублажаем приснопамятное успение твое: аще бо и преставился еси от нас, но жив сый и по смерти, не отступаеши от нас духом, обаче и мощей твоих рака пред очима нашими видима есть всегда. К тебе убо припадаем, тебе молимся и восхваляем тя сице:

Радуйся, в вере и любви божественной благоговейно от юности и благочестно до маститыя старости поживый.

Радуйся, многотрудныя и разнообразные во иночестве подвиги добре совершивый.

Радуйся, яко совершеннаго освящения от Духа Святаго исполнен еси.

Радуйся, чудному учителю твоему уподобивыйся всецелою чистотою и святостию.

Радуйся, яко с богомудрым Сергием на
Небесех присно ликуеши.

Радуйся, яко с ним купно Бога о нас грешных
умоляеши.

Радуйся, яко нетлением мощей твоих, аки
трубою, проповедуется будущее всех
воскресение.

Радуйся, стране сей и всему отечеству
нашему многоценное украшение.

Радуйся, яко тобою монахов множества в
подвизех своих укрепление приемлют.

Радуйся, яко ходатайством твоим вернии и в
молвах житейских спасаются.

Радуйся, отче наш Савво, чудотворче
преславный.

Кондак 13

О преславный чудотворче и скорый
заступниче наш, блаженне отче Савво! Малое
сие от нас приношение ныне приим, испроси
нам у Христа Бога утверждение в вере и
братолюбии, еже быти неврежденным от всяких
искушений, бед и напастей, и во грядущем веце
мук вечных избавитися всем, вопиющим Ему:
Аллилуия.

Этот кондак читается трижды, затем икос 1-й "Ангел во плоти..." и кондак 1-й "Избранный от Воеводы...".

Молитва

О пречестная и священная главо! Небеснаго Иерусалима гражданине, Пресвятая Троицы обителище, преподобне отче Савво! Велие имея дерзновение ко Всемилостивому Владыце, молися о стаде ограды твоея и о всех по духу чадах твоих. Не премолчи за ны ко Господу и не презри верою и любовью чтущих тя. Испроси предстательством твоим у Царя царствующих мир Церкви, под знаменем креста воинствующей, Архиереом святительства благолепие, монашествующим доброе в подвизах течение; святей обители сей, граду сему и всем градом и странам охранение; миру безмятежие и мир, глада и пагубы избавление; старым и немощным утешение и подкрепление, юным и младенцам благое в вере возрастание, в Евангельском учении твердое обучение, и в чистоте и целомудрии пребывание; вдовицам и сиротам милость и заступление, плененным отраду и возвращение, болящим исцеление, малодушным успокоение, заблуждшим исправление, согрешающим дух сокрушения,

бедствующим благовременну помощь. Не посрами нас, к тебе с верою притекающих, споспешествуй, яко чадолюбивый отец чадам, и нам понести иго Христова во благодушии и терпении, и всех управи в мире и покаянии скончати живот свой непостыдно и преселитися со упованием во обители небесныя. Идеже ты, по трудех и подвизех, ныне водворяешися со Ангелы и Святыми, зря и прославляя Бога, в Троице славимаго, Отца и Сына и Святаго Духа. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**